



EL COQ D'AUBRY

Ch'est li qui veille sur not'villache
Tout in haut du clocher ; et là, y'est bin sache.
Mais c'que vous n'savez pas mes gins
Ch'est qu'min coq, ch'est l'pus biau d'l'arrondissement.

Ouais... vous êtes là qu'vous riez...
Mais c'que j'vous dis ch'est vrai.
Car min coq, tout au contraire des autes,
Ch'est l'seul d'l'arrondissement qu'est vraiment PATRIOTE !!!

J'vas vous raconter s'n'histoire, car al est véridique.
Ein fos j'rinconte el Maire, y'étoit tout débousé...
D'ein air tout abattu y'a dit : j'vas t'expliquer :
Faudrot r'faire el clocher... qui ch'est qui va payer ?

J'y dis : faut pas s'in faire, faut donner un coup d'main.
Y'appartient à tertous car y'est républicain !!!
Les couvreux y sont v'nus pour eux faire leur labeur
Et y'ont déquindu l'coq, pour mi l'mette in couleur.

Ch'est alors qué l'idée al m'est v'nue
Que concernant l'couleur faut faire du jamais vu !!!
J'y ai fait un biau cou bleu et ses deux ailes bin blanques.
S'vinte j'l'ai mis rouche, s'queue dorée comme avant.

Quand in l'a exposé au bistrot qui fait l'coin,
Y'a eu ein'paire ed gins qui n'étoient pas contints.
L'Maire y m'a fait appeler et y m'a dit : ch'est biête,
Mais un coq bleu blanc rouche, nous, in n'peut pas l'armette.

J'ai eu biau y'expliquer qué mi jé l'trouvos biau
Car ces trois couleurs-là, ch'est celles d'not' drapeau,
Y m'a dit : non, j'veux pas être imbêté, y faut l'mettre au doré.
Cha m'a tout ertourné ; mais comme j'étois têtü,

L'solution j'l'ai trouvée.

J'ai pris d'el pout dorée, rallongée à l'essence
Et j'ai barbouillé l'coq ed pus s'cou jusqu'à s'panche.
Quand ils l'ont ermonté, fallot vir si y'étoit biau.
El soleil tapant d'ssus, y nous éblouissot.

Mais v'là qu'huit jours après, un fort orage éclate.
El iau elle déquindot, et cha à dique et daque...
El doré d'ssus l'pauv' coq qui n'avot pas d'ret'nue,
Au bout d'deux, tros averses y'étoit tout disparu...

Aussi, si vous passez un jour par Aubry-du-Hainaut
Arrêtez-vous su l'plache et ravisez l'osiau ;
Sas couleurs bleu, blanc, rouche, y sont bin ervenues ;
J'vous dis qu'ein coq pareil ... jamais in n'l'avot vu.